



PERATURAN TETAP SUKAN ORANG PEKAK MALAYSIA



1.0 PENDAHULUAN

Sejarah sukan SOPMA bermula pada tahun 1985 apabila beberapa orang pemimpin Pekak yang aktif pada masa itu mengadakan mesyuarat di Alor Setar, Kedah. Mereka telah bersepatat untuk mewujudkan Kejohanan Sukan Antara Kelab-kelab Pekak (KSAKP).

Kejohanan KSAKP kali pertama di Kuala Lumpur hanya melibatkan kelab-kelab Pekak yang aktif iaitu Kedah, Pulau Pinang, Kuala Lumpur dan Selangor yang menghantar sejumlah 127 orang peserta.

Kejohanan ini dianjurkan dan dikelolakan oleh kelab-kelab Pekak pada setiap tahun, iaitu Pulau Pinang pada tahun 1986, Selangor (1987), Kedah (1988) dan Kuala Lumpur (1989).

Pada tahun 1990 pemimpin-pemimpin Pekak bermesyuarat dan membincangkan hala tuju kejohanan KSAKP. Mereka menerima maklum balas yang positif dan permintaan yang tinggi daripada persatuan-persatuan Pekak dari seluruh negara yang berhasrat menyertai kejohanan tersebut.

Keputusan mesyuarat itu membawa kepada kelahiran Sukan Kebangsaan Orang Pekak atau ringkasnya SKOP, iaitu nama KSAKP ditukarkan kepada SKOP. Johor Bahru menjadi tuan rumah yang pertama menggunakan nama baru SKOP dengan edisi ke-6 pada tahun 1990. Kejohanan SKOP diadakan pada setiap tahun dan dikelolakan oleh persatuan orang Pekak Negeri dari tahun 1990 hingga tahun 1993.

Pada tahun 1993 para pemimpin persatuan Pekak negeri memutuskan bahawa penganjuran SOPMA yang akan datang hendaklah diadakan secara dwitahunan. Keputusan itu dibuat sewaktu Kuantan, Pahang menganjurkan SKOP kali ke-9.

SOPMA melakarkan pelbagai kejayaan yang menyaksikan beberapa orang atlet Pekak yang pernah menjadi jaguh dalam kejohanan SOPMA berjaya mengharumkan nama negara dengan membawa pulang pingat dari Sukan Orang Pekak Asia Pasifik (*Asia Pacific Deaf Games*) dan Sukan Olimpik Orang Pekak (*Deaflympics Games*).

Berikutan kejayaan tersebut, Mesyuarat Agung Dwitahunan MSDeaf pada tahun 2002 mencapai kata putus bahawa nama Sukan Kebangsaan Orang Pekak

ditukarkan kepada Sukan Orang Pekak Malaysia serta terciptanya logo SKOP yang berwajah baru.

Walau bagaimanapun nama singkatannya, SKOP dikekalkan. Pulau Langkawi menjadi medan sukan yang pertama menggunakan nama dan logo Sukan Orang Pekak Malaysia yang berwajah baru pada tahun 2003.

Baru-baru ini penukaran nama SKOP ke SOPMA telah diumumkan semasa Bengkel Pelan Tindakan MSDeaf 5 Tahun (2009-2013) di Ipoh, Perak pada 14 November 2008 dan telah mendapat sokongan daripada Ahli-Ahli Gabungan MSFD (sebelum ini, Persekutuan Sukan Orang Pekak Malaysia).

Dengan penukaran nama dan logo tersebut, ia membuka peluang kepada semua persatuan Pekak negeri mengambil bahagian di SOPMA sekali gus menjadi medan yang ideal dalam melahirkan atlet Pekak yang berbakat, berdisiplin dan berdaya saing di peringkat kebangsaan dan antarabangsa.

2.0 DEFINISI

- 2.1. Persatuan Sukan Orang Pekak Malaysia (selepas ini dirujuk sebagai “MSDeaf”) adalah badan yang bertanggungjawab di dalam memastikan penganjuran dan aktiviti sukan bagi Orang Kurang Upaya (OKU) Pendengaran.
- 2.2. “NEGERI” bermaksud kesemua negeri di Malaysia termasuk Wilayah Persekutuan (Kuala Lumpur / Putrajaya / Labuan).
- 2.3. “JAWATANKUASA TERTINGGI” bermaksud Jawatankuasa Tertinggi SUKAN SOPMA MALAYSIA yang dilantik oleh Kementerian Belia & Sukan dengan persetujuan Persatuan Sukan Orang Pekak Malaysia (MSDeaf).
- 2.4. “JAWATANKUASA PENGELOLA” bermaksud Jawatankuasa yang dilantik untuk mengelolakan kejohanan “SUKAN ORANG PEKAK MALAYSIA”.
- 2.5. “NEGERI YANG TERPILIH” bermaksud negeri yang ditetapkan oleh Jawatankuasa Tertinggi untuk mengelolakan kejohanan SUKAN ORANG PEKAK MALAYSIA.
- 2.6. “PENGERUSI” bermaksud Pengerusi Jawatankuasa Tertinggi.
- 2.7. ‘ATLET KEBANGSAAN’ bermaksud atlet yang telah mewakili Negara Malaysia di Sukan Orang Pekak Asia Pasifik (*Asia Pacific Deaf Sports Games*), Sukan Olimpik Orang Pekak (*Deaflympics Games*) serta kejohanan-kejohanan sukan di peringkat antarabangsa yang diiktiraf oleh *International Committee of Sports for the Deaf (CISS)* dan *Asia Pacific Deaf Sports Confederation (APDSC)*.

3.0 PRINSIP-PRINSIP ASAS

- 3.1. "SUKAN ORANG PEKAK MALAYSIA" adalah satu kejohanan sukan di peringkat kebangsaan yang dipertandingkan di bawah pengawalan MSDeaf dan ia diadakan setiap dua tahun secara berselang-seli.
- 3.2. "SUKAN ORANG PEKAK MALAYSIA" akan diperhitungkan mulai daripada Kejohanan Sukan Antara Kelab-kelab Pekak (KSAKP) yang pertama berlangsung di Kuala Lumpur pada tahun 1985.
- 3.3. Jawatankuasa Tertinggi mempunyai hak sepenuhnya untuk mengarahkan suatu pengelolaan kejohanan "SUKAN ORANG PEKAK MALAYSIA" di dalam negeri yang terpilih.
- 3.4. Penghormatan pengelolaan kejohanan "SUKAN ORANG PEKAK MALAYSIA" seharusnya diamanahkan kepada negeri yang menganjurkan SUKAN Malaysia (SUKMA).

4.0 JAWATANKUASA TERTINGGI

- 4.1. Jawatankuasa Tertinggi adalah terdiri daripada seorang Pengerusi, seorang Timbalan Pengerusi, seorang Setiausaha, seorang Bendahari dan beberapa orang ahli yang terdiri daripada ahli-ahli yang dinyatakan dalam seksyen kecil 4.3 di bawah.
- 4.2. Presiden MSDeaf hendaklah menjadi Pengerusi Bersama Jawatankuasa Tertinggi.
- 4.3. Ahli-ahli Jawatankuasa Tertinggi yang lain hendaklah dilantik oleh Pengerusi dan terdiri daripada ahli-ahli yang berikut:
 - a) Ketua Pengarah,
Jabatan Belia & Sukan Negara
Kementerian Belia dan Sukan;
 - b) Empat orang daripada Exco,
Persatuan Sukan Orang Pekak Malaysia;
 - c) Ketua Pengarah ,
Jabatan Kebajikan Masyarakat Malaysia;
 - d) Ketua Pengarah,
Majlis Sukan Negara ;
 - e) Ketua Pengarah
Institut Sukan Negara
 - f) Ketua Pengarah
Kementerian Pelajaran Malaysia

- g) Semua Pengarah,
Jabatan Belia & Sukan Negeri ; *dan*
 - h) Mana-mana individu yang difikirkan sesuai oleh Pengerusi.
- 4.4. Ahli-ahli Jawatankuasa Tertinggi kecuali Pengerusi hendaklah memegang jawatan bagi suatu tempoh yang tidak melebihi **DUA (2)** tahun dan adalah layak dilantik semula bagi penganjuran yang berikutnya.
- 4.5. Ahli-ahli Jawatankuasa Tertinggi kecuali Pengerusi boleh meletakkan jawatannya pada bila-bila masa dengan memberikan **SATU (1)** bulan notis bertulis kepada Pengerusi.
- 4.6. Sekiranya terdapat kekosongan Ahli Jawatankuasa, maka kekosongan tersebut hendaklah diisi dalam masa **SATU (1)** bulan. Ahli Jawatankuasa Tertinggi yang baru dilantik hendaklah memegang jawatan ahli yang telah mengosongkan jawatan tersebut bagi selama tempoh baki pengosongan jawatan tersebut dan beliau adalah layak dilantik semula bagi penganjuran yang berikutnya.
- 4.7. Tugas-tugas serta Tanggungjawab Jawatankuasa Tertinggi ialah :
- a) Menjamin kejohanan “SUKAN ORANG PEKAK MALAYSIA” dapat berjalan dengan sempurna serta memastikan masa dan giliran negeri yang ditetapkan sebagai negeri yang terpilih mengikut turutan seperti negeri yang menganjurkan Sukan Malaysia (SUKMA).
 - b) Memastikan Jawatankuasa Pengelola ditubuhkan sebelum pelaksanaan kejohanan “SUKAN ORANG PEKAK MALAYSIA” di negeri yang terpilih dan juga memastikan Jawatankuasa Pengelola menjalankan tugas-tugasnya dengan sempurna.
 - c) Memastikan kejohanan “SUKAN ORANG PEKAK MALAYSIA” dilaksanakan berdasarkan kepada prinsip-prinsip asas dan perkara yang tercatat di dalam semua peraturan kejohanan “SUKAN ORANG PEKAK MALAYSIA”.
- 4.8. Kuasa-kuasa Jawatankuasa Tertinggi adalah :
- a)
 - i) Pengerusi Jawatankuasa Tertinggi mempunyai kuasa untuk memanggil sesuatu mesyuarat apabila difikirkannya perlu.
 - ii) Pada mana-mana prosiding atau mesyuarat Jawatankuasa Tertinggi, hendaklah terdiri daripada **SEPARUH (½)** daripada ahli Jawatankuasa Tertinggi termasuk Pengerusi untuk mendapatkan kuorum;

iii) Jika Pengerusi tidak hadir dalam mesyuarat atau mana-mana prosiding, Timbalan Pengerusi yang hadir hendaklah mempengerusikan mesyuarat tersebut sebagai Pengerusi.

- b) Pengerusi boleh menjemput wakil dari mana-mana badan yang berkaitan untuk menghadiri mesyuarat, jika, dengan kehadiran mereka boleh membantu dalam penganjuran kejohanan SUKAN ORANG PEKAK MALAYSIA.
- c) Jawatankuasa Tertinggi mempunyai kuasa untuk menggantung dan/atau mengenakan penalti ke atas mana-mana negeri, pasukan, pegawai, jurulatih atau atlet yang melanggar peraturan kejohanan daripada mengambil bahagian di kejohanan "SUKAN ORANG PEKAK MALAYSIA" yang berikutnya.
- d) Jawatankuasa boleh pada bila-bila masa menjemput atau menerima permohonan daripada mana-mana negara untuk bertanding dalam mana-mana acara sukan yang dipertandingkan dalam kejohanan SUKAN ORANG PEKAK MALAYSIA sebagai peserta atau kontinjen jemputan.
- e) Jawatankuasa Tertinggi boleh mengarah atau menarik balik apa-apa keputusan yang dibuat oleh Jawatankuasa Pengelola sekiranya difikirkannya perlu.

4.9. Tiada tindakan atau prosiding undang-undang yang lain boleh diambil terhadap mana-mana ahli-ahli Jawatankuasa Tertinggi.

5.0 JAWATANKUASA PENGELOLA

5.1. Jawatankuasa Pengelola "SUKAN ORANG PEKAK MALAYSIA" adalah terdiri daripada seorang Pengerusi, seorang Timbalan Pengerusi, Setiausaha, Bendahari dan beberapa orang ahli yang difikirkan perlu yang dilantik oleh Jawatankuasa Tertinggi.

5.2. Tempoh perkhidmatan Ahli-Ahli Jawatankuasa Pengelola adalah bermula dari tarikh perjanjian penganjuran kejohanan SUKAN ORANG PEKAK MALAYSIA yang telah dipersetujui oleh kedua-dua pihak sehingga penamatan kejohanan SUKAN ORANG PEKAK MALAYSIA.

5.3. Jawatankuasa Pengelola adalah berperanan di dalam perkara-perkara berikut:

- a) Bertanggungjawab sepenuhnya di dalam pengelolaan kejohanan "SUKAN ORANG PEKAK MALAYSIA".
- b) Mengadakan mesyuarat-mesyuarat Jawatankuasa Pengelola dari masa ke semasa.

- c) Menubuh dan melantik Jawatankuasa-Jawatankuasa Kecil dengan mempunyai bidang tugas khusus masing-masing dalam melaksanakan pengelolaan kejohanan "SUKAN ORANG PEKAK Malaysia".

5.4. Tugas-tugas Jawatankuasa Pengelola adalah:-

- a) Jawatankuasa Tertinggi menyerahkan segala tugas penganjuran kejohanan "SUKAN ORANG PEKAK MALAYSIA" kepada negeri yang terpilih mengikut kandungan perjanjian penganjuran yang telah dipersetujui oleh kedua-dua pihak.
- b) Negeri yang terpilih hendaklah menubuhkan sebuah Jawatankuasa Pengelola yang disahkan oleh pihak berkuasa negeri tersebut sebelum menandatangani satu perjanjian penganjuran kejohanan SUKAN ORANG PEKAK MALAYSIA, dan segala urusan Penganjuran kejohanan "SUKAN ORANG PEKAK MALAYSIA" perlulah mendapat kerjasama daripada Jawatankuasa Tertinggi, Kementerian Belia & Sukan Malaysia, Persatuan Sukan Orang Pekak Malaysia, Majlis Sukan Negara, Majlis Sukan Negeri-negeri, Jabatan Belia & Sukan Negeri-negeri serta Persatuan-persatuan Sukan Kebangsaan dan Negeri supaya pengelolaan kejohanan "SUKAN ORANG PEKAK MALAYSIA" dapat dilaksanakan mengikut peraturan-peraturan yang diperuntukkan.
- c) Jawatankuasa Pengelola adalah bertanggungjawab membuat segala persediaan yang diperlukan untuk menyempurnakan pelaksanaan kejohanan "SUKAN ORANG PEKAK MALAYSIA" dan ianya adalah tertakluk kepada kelulusan Jawatankuasa Tertinggi.
- d) Wakil Jawatankuasa Tertinggi dari semasa ke semasa hendaklah dijemput hadir ke Mesyuarat-Mesyuarat Jawatankuasa Pengelola supaya mempunyai pengetahuan mengenai segala prosiding atau maklumat pelaksanaan kejohanan SUKAN ORANG PEKAK MALAYSIA
- e) Jawatankuasa Pengelola hendaklah menubuhkan Jawatankuasa Teknikal dan Pertandingan yang terdiri daripada wakil-wakil MSDeaf, Majlis Sukan Negara, Jabatan Belia & Sukan Negeri-negeri serta Persatuan-persatuan Sukan Kebangsaan dan Negeri-negeri.
- f) Jawatankuasa Teknikal dan Pertandingan hendaklah menubuhkan Jawatankuasa Kecil Teknikal dan Pertandingan bagi setiap jenis sukan yang terdiri daripada wakil-wakil MSDeaf dan wakil-wakil Majlis Sukan Negeri berkenaan

- 5.5. Sekiranya mana-mana ahli Jawatankuasa Pengelola yang melanggar peraturan-peraturan atau garis panduan yang diperuntukkan dalam SUKAN ORANG PEKAK MALAYSIA, maka, Jawatankuasa Tertinggi boleh menggantung mereka daripada mengambil bahagian di kejohanan SUKAN ORANG PEKAK MALAYSIA dan / atau mengenakan penalti terhadap mereka,
- 5.6. Tiada tindakan atau prosiding undang-undang yang lain boleh diambil terhadap mana-mana ahli-ahli Jawatankuasa Pengelola.

6.0 SEKRETARIAT

- 6.1. Sekretariat adalah sebuah badan eksekutif yang beroperasi sepenuh masa dalam membantu mengelolakan kejohanan “SUKAN ORANG PEKAK MALAYSIA”.
- 6.2. Sekretariat pada setiap masa, adalah bertanggungjawab sepenuhnya kepada Jawatankuasa Pengelola.

7.0 PERATURAN-PERATURAN PENGELOLAAN

- 7.1. Jawatankuasa Tertinggi hendaklah menetapkan satu tarikh, bandar dan negeri di mana kejohanan 'SUKAN ORANG PEKAK MALAYSIA' berikutnya diadakan.
- 7.2. Negeri yang terpilih dan diamanahkan bagi mengelolakan kejohanan “SUKAN ORANG PEKAK MALAYSIA” adalah bertanggungjawab kepada Jawatankuasa Tertinggi untuk membentuk sebuah Jawatankuasa Pengelola bagi mengendalikan kejohanan tersebut.
- 7.3. Negeri yang terpilih seharusnya memberi penghormatan pengelolaan melalui suatu pengakuan bertulis atas kesanggupan bagi mengelolakan kejohanan “SUKAN ORANG PEKAK MALAYSIA” kepada Jawatankuasa Tertinggi.
- 7.4. Kejohanan “SUKAN ORANG PEKAK MALAYSIA” mestilah diadakan setiap dua tahun berselang-seli dengan kejohanan SUKAN ORANG PEKAK ASEAN.
- 7.5. Tempoh pelaksanaan kejohanan “SUKAN ORANG PEKAK MALAYSIA” adalah tidak melebihi **SEPULUH (10)** hari termasuk tarikh-tarikh klasifikasi atlet dan pertandingan serta majlis-majlis acara perasmian dan penutupan.
- 7.6. Jawatankuasa Tertinggi hendaklah menetapkan jumlah dan jenis sukan yang dipertandingkan dalam kejohanan “SUKAN ORANG PEKAK MALAYSIA”.
- 7.7. Jemputan untuk menyertai kejohanan “SUKAN ORANG PEKAK MALAYSIA” hendaklah dihantar oleh Jawatankuasa Pengelola atas arahan Jawatankuasa Tertinggi kepada semua Menteri Besar dan Ketua Menteri.

8.0 BENDERA DAN LAMBANG

- 8.1. Lambang kejohanan "SUKAN ORANG PEKAK Malaysia" adalah lambang nyalaaan obor yang dilakarkan melalui 3 warna iaitu merah, kuning dan biru mengikut warna bendera Jalur Gemilang. Merah membawa maksud semangat juang atlet pekak yang membara, warna biru membawa maksud ketahanan mental dan fizikal atlet pekak dan manakala warna kuning membawa maksud semangat setia kawan dan persaingan yang sihat sesama atlet pekak. Lambang dua tangan disaluti bendera Jalur Gemilang adalah simbol sukan orang pekak yang diterjemahkan oleh MSDeaf.
- 8.2. Lambang ini tidak boleh diguna pakai untuk tujuan perniagaan kecuali dengan kelulusan daripada Jawatankuasa Tertinggi. Lambang ini semestinya dilindungi di bawah undang-undang.
- 8.3. Lambang kejohanan "SUKAN ORANG PEKAK MALAYSIA" digunakan sebagai bendera kejohanan, semestinya dikibarkan sepanjang tempoh kejohanan "SUKAN ORANG PEKAK MALAYSIA" bersama-sama dengan Bendera Malaysia, Bendera MSDeaf dan Bendera-Bendera Negeri yang disediakan oleh Jawatankuasa Pengelola di Stadium Utama, tempat-tempat pertandingan, di Perkampungan Sukan dan lain-lain tempat yang sesuai.
- 8.4. Bendera kejohanan SUKAN ORANG PEKAK MALAYSIA semestinya disediakan di dalam Stadium Utama dan bendera tersebut hendaklah dikibarkan sepanjang tempoh kejohanan SUKAN ORANG PEKAK MALAYSIA diadakan.
- 8.5. Bendera kejohanan SUKAN ORANG PEKAK MALAYSIA semestinya diserahkan kepada Menteri Besar / Ketua Menteri / Exco Sukan Negeri atau Pengarah JBS bagi negeri yang menjadi tuan rumah berikutnya dalam Upacara Penutup kejohanan SUKAN ORANG PEKAK MALAYSIA.

9.0 LOGO

- 9.1. Logo seharusnya mengandungi perkataan "SOPMA" serta siri bilangan kejohanan "SUKAN ORANG PEKAK MALAYSIA" di bawah lambang logo SOPMA.
- 9.2. Logo kejohanan semestinya dicetak dan diguna pakai di dalam segala dokumen Urusan penganjuran kejohanan SUKAN ORANG PEKAK MALAYSIA sahaja dan mendapat kelulusan daripada Jawatankuasa Tertinggi.

10.0 PENAJAAN DAN KUTIPAN DERMA

- 10.1. Lambang dan Logo SUKAN ORANG PEKAK MALAYSIA tidak seharusnya diguna pakai bagi maksud perniagaan tanpa kelulusan daripada Jawatankuasa Tertinggi / MSDeaf.

- 10.2. MSDeaf mempunyai hak milik sepenuhnya ke atas lambang dan logo kejohanan SUKAN ORANG PEKAK MALAYSIA dan juga eksploitasi promosi serta penyiaran.
- 10.3. Semua rundingan penajaan di peringkat kebangsaan dan antarabangsa serta hak penyiaran TV dan Radio hendaklah dibuat melalui Jawatankuasa Tertinggi dan Jawatankuasa Pengelola.
- 10.4. Jawatankuasa Pengelola seharusnya menyediakan dan menyerahkan satu laporan lengkap Penyata Kewangan yang telah diaudit selewat-lewatnya dalam tempoh **ENAM (6)** bulan selepas SUKAN ORANG PEKAK MALAYSIA berakhir.

11.0 PEMILIHAN TUAN RUMAH

- 11.1. Pemilihan tuan rumah bagi kejohanan SUKAN ORANG PEKAK MALAYSIA adalah berdasarkan seperti pemilihan tuan rumah bagi SUKAN MALAYSIA (SUKMA) yang diputuskan oleh pihak kerajaan.

12.0 PERJANJIAN PENGANJURAN

- 12.1. Negeri yang terpilih dikehendaki menandatangani suatu perjanjian penganjuran dengan Jawatankuasa Tertinggi untuk menganjurkan kejohanan SUKAN ORANG PEKAK MALAYSIA. Perjanjian tersebut hendaklah ditandatangani oleh Pengerusi Jawatankuasa Tertinggi atau wakilnya bagi pihak Jawatankuasa Tertinggi bersama-sama dengan pihak MSDeaf dan pihak Kerajaan Negeri (Penganjur).
- 12.2. Perjanjian persetujuan untuk menganjurkan kejohanan SUKAN ORANG PEKAK MALAYSIA tersebut mestilah dilakukan dan ditandatangani selewat-lewatnya dalam tempoh **TIGA (3)** bulan selepas negeri yang terpilih diisytiharkan sebagai penganjur kejohanan SUKAN ORANG PEKAK MALAYSIA.

13.0 PENETAPAN BILANGAN DAN JENIS SUKAN

- 13.1. Jumlah sukan serta acara yang perlu dipertandingkan adalah ditentukan oleh Jawatankuasa Tertinggi dengan mengambil kira pelbagai aspek termasuk kemudahan yang mesra OKU (disabled friendly) terutamanya visual di tempat kejohanan.

14.0 ACARA PEMBUKAAN.

- 14.1. Setiap Program bagi acara pembukaan semestinya dikemukakan kepada Jawatankuasa Tertinggi sebelum **ENAM (6)** bulan dari tarikh kejohanan SUKAN ORANG PEKAK MALAYSIA diadakan untuk tujuan kelulusan.

- 14.2. 14.2 DYMM Sultan / TYT Yang Dipertua Negeri atau wakilnya perlu diberikan penghormatan untuk merasmikan kejohanan SUKAN ORANG PEKAK MALAYSIA di negeri yang terpilih dan seharusnya dijemput oleh Pengerusi bagi Jawatankuasa Tertinggi dan Presiden MPM dari pintu masuk bagi acara pembukaan diadakan.
- 14.3. Jawatankuasa Pengelola mestilah mengambil kira dari aspek protokol terutamanya bagi susunan tempat duduk khas semasa acara Pembukaan diadakan termasuk juga mengambil kira tempat-tempat pertandingan dan mempunyai kawalan keselamatan yang ketat dalam perasmian acara pembukaan.
- 14.4. Program-program bagi acara Pembukaan Rasmi mestilah mengambil kira perkara-perkara yang berikut:-
- a) Perbarisan atau Lintas Hormat oleh semua Kontinjen Negeri harus memakai pakaian yang seragam dengan memegang papan tanda yang mengandungi nama negeri dan bendera negeri masing-masing sahaja;
 - b) Perbarisan atau Lintas Hormat oleh semua Kontinjen Negeri seharusnya mengikut turutan abjad ketika lintas hormat di hadapan Pentas Utama;
 - c) Memberi tabik hormat ketika melintas di hadapan Pentas Utama;
 - d) Upacara Menaikkan Bendera Kejohanan;
 - e) Upacara Nyalaan Obor Kejohanan;
 - f) Lafaz Perasmian oleh VVIP;
 - g) Bacaan Ikrar oleh Atlet;
 - h) Bacaan Ikrar oleh Pegawai Teknikal; *dan*
 - i) Apa-apa yang difikirkan perlu oleh Jawatankuasa Pengelola
- 14.5. Setiap Program ini seharusnya mengikut protokol dan mengambil masa tidak melebihi **DUA (2)** jam.

15.0 PINGAT KEMENANGAN

- 15.1. Pingat kemenangan untuk kejohanan SUKAN ORANG PEKAK MALAYSIA hendaklah disediakan oleh Jawatankuasa Pengelola.

- 15.2. Bagi acara individu dan pasukan, pemenang pertama akan memperolehi pingat emas, pemenang kedua pingat perak dan seterusnya, pemenang ketiga pingat gangsa.

16.0 UPACARA KEMENANGAN.

- 16.1. Pingat-pingat kemenangan hendaklah dihadiahkan kepada pemenang-pemenang sebaik sahaja selesai acara sesuatu pertandingan di tempat berlangsungnya pertandingan berkenaan. Pemenang Pertama hendaklah berdiri di tengah-tengah, Pemenang Kedua di sebelah kanannya dan Pemenang Ketiga di sebelah kirinya.
- 16.2. Sebaik sahaja penyampaian pingat-pingat, maka bendera negeri pemenang Pertama, Kedua dan Ketiga akan dinaikkan dengan diiringi lagu negeri pemenang pertama.
- 16.3. Jawatankuasa Pengelola adalah diminta untuk menyediakan semua lagu rasmi negeri dan bendera-bendera negeri yang mengambil bahagian di Sukan Orang Pekak Malaysia.

17.0 PIALA PUSINGAN

- 17.1. Jawatankuasa Pengelola akan menyediakan piala-piala anugerah seperti berikut:-
- a) Piala Atlet Cemerlang
 - i) Atlet Lelaki
 - ii) Atlet Wanita
 - b) Piala / Trofi Cabaran
 - i) Piala Jaguh Negeri (Trofi Kejohanan)
 - ii) Piala Semangat SOPMA
 - iii) Piala Gerakan Orang Pekak Negara (GOPN)
- 17.2. Piala Atlet Cemerlang akan dianugerahkan kepada seorang atlet lelaki dan seorang atlet wanita yang paling cemerlang dalam kejohanan SUKAN ORANG PEKAK MALAYSIA.
- 17.3. Piala Jaguh Negeri akan dianugerahkan kepada negeri yang memenangi bilangan pingat emas yang paling banyak. Jika seri, jumlah pingat perak dan gangsa boleh diambil kira untuk menentukan pemenang bagi Piala Jaguh Negeri.
- 17.4. Piala Semangat SOPMA akan dianugerahkan kepada negeri yang memenangi bilangan jumlah pingat yang paling banyak. Jika terdapat seri, rekod yang paling banyak dipecahkan diikuti dengan bilangan atlet wanita yang paling ramai dan juga atlet di bawah umur 18 tahun yang memenangi pingat ,

hendaklah diambil kira untuk menentukan pemenang bagi Piala Semangat OKU.

- 17.5. Piala Gerakan Orang Pekak Negara (GOPN) akan dianugerahkan kepada negeri yang mempunyai paling banyak penyertaan dalam sukan. Jika terdapat seri, acara sukan yang paling banyak disertai diikuti dengan bilangan atlet wanita paling banyak dan atlet di bawah umur 20 tahun yang memenangi pingat, hendaklah diambil kira untuk menentukan pemenang Piala GPN.

18.0 UPACARA PENUTUPAN

- 18.1. Upacara Penutupan Rasmi hendaklah dilakukan sebaik sahaja selesai acara pertandingan yang terakhir. Tempatnya ditetapkan oleh Jawatankuasa Pengelola.

Program bagi Majlis Penutupan Rasmi mestilah mengambil kira perkara-perkara yang berikut :-

- a) Upacara Penyampaian Piala Atlet Cemerlang dan Piala Cabaran;
- b) Lafaz Penutupan oleh VVIP;
- c) Aspek protokol dan susunan tempat duduk khas di Pentas Utama;
- d) Upacara Menurunkan Bendera Kejohanan;
- e) Upacara Memadamkan Obor Kejohanan;
- f) Penyerahan Bendera Kejohanan Kepada Tuan Rumah; SUKAN ORANG PEKAK MALAYSIA yang berikutnya;
- g) Persembahan "Selamat Datang" oleh Tuan Rumah SUKAN ORANG PEKAK MALAYSIA yang berikutnya; *dan*
- h) Apa-apa yang difikirkan perlu oleh Jawatankuasa Pengelola.

19.0 KAD AKREDITASI

- 20.1. Jawatankuasa Pengelola hendaklah mengeluarkan Kad Akreditasi SUKAN ORANG PEKAK MALAYSIA kepada semua individu yang terlibat di dalam penganjuran SUKAN ORANG PEKAK MALAYSIA mengikut kategori yang ditetapkan.

20.0 PINDAAN PERATURAN.

- 20.1. Semua undang-undang dan peraturan-peraturan SUKAN PARALIMPIAD MALAYSIA ini hanya boleh dipinda setelah dibincang dan dipersetujui oleh Jawatankuasa Tertinggi sahaja.

Disediakan oleh

PERSATUAN SUKAN ORANG PEKAK MALAYSIA

Dikemaskini pada 01/02/2013

Nota: Peraturan Tetap Sukan Orang Pekak Malaysia (SOPMA) diambil daripada draf Sukan Orang Pekak Malaysia kali ke-18 2014 (SKOP XVIII) yang diadakan di Melaka Bandaraya Bersejarah dan akan diperkenalkan dalam mesyuarat Jawatankuasa Tertinggi SKOP XVIII pada tahun 2013.